

**SAUNOAGA A LE HAI KOMESINA (AFIOGA LEASI PAPALI'I SCANLAN) I LE
TATALAINA O LE OFISA FOU O LE SI'UFOFOGA O LE LAUMUA I PORIRUA**

ASO 30 SETEMA 2020

Oute fa'atalofa atu i ou Paia Sausaugata Samoa i ona tulaga Fa'alupelupeina. O ou Paia fa'ale-Tala Lelei, ma Mamalu fa'ale-Atunu'u, o le a nu'unu'u atu fa'atini o tausala.

Ae avea ia lenei avanoa e fai ai a'u ma fofoga tau momoli o le Afioga a le Ao Mamalu o le Malo o Samoa, le Afioga i le Ali'i Palemia, le Kapeneta ma Tagatanu'u uma o Samoa oute momoli atu ai le Fa'amalō i lau Afioga a le Ta'ita'ifono, le Komiti Fa'atonu, le Afioga a le Ali'i Pule ma le Aufaigaluega, ona o le lenei Matati'a Fou taua ua ausia e le Si'ufofoga o le Laumua.

Ua fa'amalō le finau. Malo le fai o le faiva. Fa'amalo i le tofā ua a'e, ua fausia ma tatala ai lenei Nofoga o le Si'ufofoga o le Laumua, i totonu o Porirua.

Fa'afetai mo le auaunaga taua faifaipea a le Si'ufofoga o le Laumua' mo le mamalu o Samoa i Aotearoa nei, i nei mau tausaga e tele.

O a outou Galuega Faufautua ma le Tau Logologo, aemaise ai le fa'atinoina o le tele o Polokalame tau A'oa'oga i aso ta'itasi, e talitonu ua fesoasoani tele lea mo le soifua manuia o nai o tatou tagata Samoa.

O le sao maualuga fo'i a le Si'ufofoga o le Laumua, i le fa'atauaina o le tatou Gagana Samoa, o se mitamitaga tele lea mo Mātua aemaise ai Tinā ma Tamā matutua. Auā fo'i, ua fesoasoani tele lea i le a'oa'oina o le tupulaga talavou, e le gata e tautatala ai i la tatou gagana a o le malamalama ai fo'i i Tū ma Aga a Samoa.

Fa'afetai tele mo feso'otaiga faifaipea a le Su'ifofoga o le Laumua ma si o tatou Atunu'u Pele, e ui atu lea i Lipoti ma Tala Fou mai Samoa i lea aso ma lea aso. Ua avea lava lenei auaunaga taua, ma auala ua silafia lelei ai e nai o tatou Tagata, o lo'o ala'ala ma papa'a'ao i fafo mai o Samoa, mea o lo'o tutupu i totonu o si o tatou Atunu'u.

Fa'amalo mo le tulaga *lē fa'aituau* o le Si'ufofoga o le Laumua i le fa'atinoina o ana Lipoti, o ana Polokalame, fa'apea ai ma ana Galuega fai.

O le ausia ai o le isi tulaga tau auaunaga fa'aonoponei, ua fa'aaogaina ai Upega Tafailagi, o se isi lea fa'ailoga va'aia o le tofā fetala'i ma le taga'i mamao o le Komiti Fa'atonu ma le Pulega. Ae pau lava le talosaga vaivai, ina ia taga'i lelei le

Pulega i le ono avea ai o lenei auunaga e fai ma auala e fa'au mai ai fa'amatalaga lē talafeagai e ono fa'amanu'alia ai ni finagalo o le mamalu o le Atunu'u.

Ua fa'amalo i lo outou loto nu'u. Fa'afetai mo la outou tautua lē fa'alogologo tigā. Malo fo'i le onosa'i!

Alofa le Atua, ma fa'afualoaina le soifua o lau Afioga i le Ta'ita'ifono ma Sui Mamalu uma o le Komiti Fa'atonu. Fa'amauia fo'i i le Ali'i Pule ma le Afaigaluega a le Si'ufofoga o le Laumua.

I le mamalu maualuga o Samoa o lo'o maua mai lenei Fa'asalalauga, fa'afetai mo la outou lagolago mo le Si'ufofoga o le Laumua. Avea ai fo'i lenei avanoa, e fai ai a'u ma Sui o le tatou Malo, e toe momoli atu ai lava le fa'afetai tele mo lo outou sao taua mo si o tatou Atunu'u Pele, e ui atu lea i tupe fa'amomoli mo Aiga, Nu'u ma Ekalesia.

Ia fa'amanuia le Atua i lo outou Soifua, aemaise ai i lenei vaitaimi faigata o le KOVITI-19, po'o fea lava le Itu o le Lalolagi o lo'o outou Afifio ai.

Manuia tele le Tapuaiga a le Ao Mamalu o le Malo o Samoa, le Afioga a le Ali'i Palemia, aemaise ai si o tatou Atunu'u Peleina o Samoa.

SOIFUA